

आकाशवाणी जयपुर-अजमेर

दिनांक 30.08.2025

समय: 18.45 बजे

प्रादेशिक समाचार

- प्रधानमंत्री नरेन्द्र मोदी आज चीन रा तियांनजिन पूग्या-शंघाई सहयोग संगठन-एस. सी. ओ. शिखर सम्मेलन मांय भाग लेवेला ।
- प्रधानमंत्री काल संवारे ग्यारह बज्यां आकाशवाणी ऊं प्रसारित कर्या जावण वाळा खास कार्यक्रम **मन की बात** मांय विचार बतावेला ।
- विधानसभा रा सोमवार ऊं सरू व्हेवण वाळा पावस सत्र ऊं पैली काल राज्य मंत्रिमण्डल री खास मीटिंग व्हेला ।
- केन्द्रीय आवासन अर शहरी कार्यमंत्री सगळा राज्यां ने सफाई व्यवस्था मांय तेजी लावण री राय दीनी ।

अर

- राज्य रा ऊगणी हलका मांय आवता पांच-छह दिन हल्की ऊं मझला दर्जा री बारिश -लंकाऊ अर लंकाऊ-ऊगणी हलकां मांय कठे-कठे जोरदार मेह रा आसार ।

000

प्रधानमंत्री नरेन्द्र मोदी जापान रा दो दिन रा दौरा पाछे आज चीन पूग्या । चीन रा शहर तियांनजिन पूगण परां श्री मोदी रो भारतीय समुदाय रा लोगां री ओर ऊं पूरा जोश ऊं स्वागत करी ज्यो । श्री मोदी **शंघाई सहयोग संगठन-एस. सी. ओ. शिखर सम्मेलन** मांय शामिल व्हेला । दो दिन रा ई सम्मेलन मांय प्रधानमंत्री मोदी चीन रा राष्ट्रपति शी जिंगपिंग अर रूस रा राष्ट्रपति ब्लादिमिर पुतिन समेत दुनिया रा केई नेतावां सागे बातचीत करेला । एस.सी.ओ. सम्मेलन मांय संगठन री 25 साल री उपलब्धियों रो जायजो लियो जावेला अर 10 साल री विकास रणनीति अपनाई जावेला । चीन पांचवीं दफा एस.सी.ओ सम्मेलन री मेजबानी कर रह्यो है । इण ऊं पैली श्री मोदी आज जापान रा टोक्यो मांय 16 प्रान्तां रा गवर्नरां सागे मुलाकात कीनी । वे गवर्नरां ने भारत मांय चाल रह्या विकास रा कामां मांय भागीदारी करण रो न्यौतो दीनो । भारत अर जापान एक-दूजा ने मानव संसाधन मुहैया करावण री कार्य योजना ने ई मंजूरी दीनी । इण रो मकसद आवता पांच साल मांय पांच लाख लोगां री आवाजाही समेत जापान मांय कुशल अर अर्द्धकुशल मजूर भेजणो है ।

000

प्रधानमंत्री नरेन्द्र मोदी आकाशवाणी ऊं हर महीना प्रसारित कर्या जावण वाळा खास कार्यक्रम **मन की बात** मांय काल संवारे 11 बज्यां विचार बतावेला । आ ई रेडियो कार्यक्रम री 125 वीं कड़ी व्हेला । ओ कार्यक्रम आकाशवाणी अर दूरदर्शन रा पूरा नेटवर्क माथे प्रसारित कर्यो जावेला । ई सागे ई आकाशवाणी समाचार री वेबसाइट, न्यूज ऑन एआईआर मोबाइल एप,

आकाशवाणी समाचार, दूरदर्शन समाचार, प्रधानमंत्री रा दफ्तर अर सूचना अर प्रसारण मंत्रालय रा यू-ट्यूब चैनलां माथे ई ओ कार्यक्रम प्रसारित कर्यो जावेला । ओ कार्यक्रम ओटीटी प्लेटफॉर्म वेब्ज माथे ई सुण्यो जा सकेला ।

.....

000

राज्य री 16वीं विधानसभा रा एक सितम्बर ने सरू व्हेवण वाळा सत्र मांय विधायकां कानी ऊं पूछा जावण वाळा 70 फीसदी सवाल ऑनलाइन तरीका ऊं मिल्या है । विधानसभा अध्यक्ष वासुदेव देवनानी आ जाणकारी दीनी । वे बतायो के विधायक नेवा बेवसाइट माथे सवाल अपलोड कर रह्या है । स्पीकर विधानसभा रा अहलकारां ने सत्र ऊं जुड़ी सगळी तैयारियां पूरी करण रा हुकम दीना । सत्र ऊं पैली काल दोपहर राज्य मंत्रिमण्डल री मीटिंग ई बुलाई ज्यी है ।

000

मुख्यमंत्री भजन लाल शर्मा आज जैसलमेर ज़िला रा मोहनगढ़ मांय पैली वाळा सांसद अर कांग्रेस रा देवलोक व्ह्या आला नेता कर्नल सोनाराम चौधरी ने श्रद्धांजलि दीनी अर चौधरी रा पिरवार वाळां ने ढाढस बंधायो । श्रद्धांजलि सभा मांय जैसलमेर रा विधायक छोटू सिंह भाटी अर विधायक कुलदीप धनखड़ समेत भारतीय जनता पार्टी रा नेता अर कार्यकर्ता ई शामिल व्ह्या ।

000

उपमुख्यमंत्री दिया कुमारी आज रामदेवरा मांय लोक देवता बाबा रामदेव री समाधि माथे पूजा-अर्चना कर र प्रदेश री खुशहाली री कामना कीनी । खबरनवीसां सागे बातचीत करता थकां उपमुख्यमंत्री कह्यो के देश रा कोना-कोना ऊं रामदेवरा दर्शन करण सारू आवण वाळां ने सगळा जरूरी सुबीता मुहैया करावण माथे सरकार रो खास ध्यान है ।

.....

दिया कुमारी इण ऊं पैली जोधपुर रेलवे स्टेडियम मांय राख्यी ज्या लंगड़ी एक्सप्रेस कार्यक्रम मांय शामिल व्ही । वे खुद लंगड़ी टांग खेली अर दौड़ लगा र इण मांय सिरकत करण वाळा खिलाडियां रो उमाव बधायो । ई मोके वे कह्यो के पारम्परिक खेल म्हाणी धरोहर है, जिण ऊं दुनियाभर मांय म्हाणी न्यारी ओळखाण है ।

000

वन मंत्री संजय शर्मा कह्यो है के आब-ओ-हवा ने बचावण माथे सरकार रो खास ध्यान है । श्री शर्मा आज बालोतरा मांय बजट मांय करी ज्या ऐलाण रे मुजब काम, पौधा रोपण अर दूजी योजनावां अर विभागीय कामां रो जायजो लेवण सारू अहलकारां सागे मीटिंग मांय बोल रह्या हा । वे प्रदूषण नियंत्रण मण्डल रा अहलकारां ने गन्दो पाणी छोडबा वाळा कारखानां रे खिलाफ़ तुरत करड़ी कार्रवाई बाबत् कह्यो । वे हरियाळो राजस्थान अभियान रा तैत लगायी ज्या सगळा पौधा री जीओ टेगिंग करावण बाबत् ई कह्यो ।

000

केंद्रीय आवासन अर शहरी कार्य मंत्री मनोहर लाल सगळा राज्यां ने साफ-सफाई रा काम मांय तेजी लावण री राय दीनी है । शहरी हलकां सारू **स्वच्छ भारत मिशन** रा दूजा दौर ऊं जुड़ी वर्चुअल तरीका ऊं लीरीजी मीटिंग मांय मनोहर लाल कह्यो के सफ़ाई

अर शहरी विकास एक-दूजा ऊं जुड़योड़ा है। वे शहरी विकास अर नीति कार्यान्वयन रा वाहक रा तौर ऊं **सफाई लक्ष्य इकाइयां—सीटीयू** री ई चर्चा कीनी।

000

पंचायती राज और ग्रामीण विकास मंत्री मदन दिलावर कह्यो है के सरकार चारागाह ज़मी माथे गैर—कानूनी कब्ज़ा माथे खास ध्यान दे रही है। आज भीलवाड़ा मांय खबरनवीसां सागे बातचीत करता थकां वे कह्यो के राज्य मांय गोचर ज़मी माथे गैर—कानूनी कब्ज़ा हटावण सारू कार्य योजना बनायी जा रही है।

000

राज्यपाल हरिभाऊ बागड़े कह्यो है बेटा—बेटियां ने फौज़ मांय भेजण मांय माथो ऊंचो व्हेवणो मानण वाळी सगळी मायड़ां रा प्रति देश कृतज्ञ है। श्री बागड़े आज जयपुर मांय राख्यी ज्या वीरांगना सम्मान समारोह मांय बोल रह्या हा। वे कह्यो के आज़ादी री लड़ाई मांय ई पुरुषां सागे महिलावां ई हिम्मत री अद्भुत गाथावां लिखी। श्री बागड़े राजस्थान ने वीरां री धरती बताता थकां कह्यो के अठे री मायड़ां पालणा मांय ही बच्चां ने वीरता री सीख दे देवे है। राज्यपाल कह्यो के वीरांगनावां रो मान करणो म्हाणा देश री खास रीत है।

000

प्रदेश मांय चलाया जा रह्या गिवअप अभियान रा तैत सक्षम लोग मर्जी ऊं खाद्य सुरक्षा योजना ऊं नाम हटवा रह्या है। अभियान रा तैत खाद्य सब्सिडी छोड़बा री काल आखिरी तारीख है। गिवअप अभियान री सीख ऊं कोटपूतली—बहरोड़ ज़िला मांय साढे बांसठ हजार जणा मर्जी ऊं खाद्य सब्सिडी छोड़ी है। ज़िला रसद अधिकारी शशि शेखर शर्मा बतायो के ज़िला मांय 95 हजार ऊं बत्ता लोगां ने खाद्य सुरक्षा सूची ऊं जोड़ी ज्या है।

000

राज्य मांय सितम्बर महीना रा सरूआती दिनां मांय चौमासा री चोखी बिरखा व्हेवण रा आसार है। मौसम विभाग रे मुजब ई दौरान कठे—कठे भारी बारिश व्हे सके है। आज जयपुर, अजमेर, जोधपुर अर उदयपुर संभाग रा कुछ हलकां मांय गरज सागे बरसात री संभावना है। सिरोही, जालौर अर पाली मांय तेज़ बरसात रो ऑरेंज अलर्ट जद के 34 जिलां सारू येलो अलर्ट जारी करी ज्यो है। राज्य रा ऊगणी हलका मांय आवता 5—6 दिन हल्की ऊं मझला दर्जा री अर लंकाऊ अर लंकाऊ—ऊगणी हलका मांय कठे—कठे भारी बारिश व्हे सके है। ई बीचे जैसलमेर, बाड़मेर अर बीकानेर ज़िलां मांय गर्मी अर उमस रा असर बीचे दिन रो तापमान 38 डिग्री सेल्सियस ऊं ऊंचो दर्ज कर्यो जा रह्यो है। ई बीचे आज श्रीगंगानगर मांय दोपहरां पाछे झमाझम बिरखा व्ही। जालौर ज़िला रा भीनमाल, रानीवाड़ा, सांचौर अर सायला समेत केई ठौड़ा चोखो मेह बरस्सो। हनुमानगढ़ मांय व्ही ज़ोरदार बारिश रे कारण केई ठौड़ा पाणी भर ग्यो। सलूम्बर ज़िला री जयसमंद झील, सराड़ा हलका रा केजड़ अर हरसन तळाव अर डाय बांध मांय ई लगातार पाणी

आ रह्यो है। चोखी बिरखा रे कारण राज्य रा 353 बंधा पूरा भर गया है, जद के 219 बंधा थोड़ा घणा भर्या है।

000